

KUVÛLUKA MUKALENGE



Twasàkidila, Mwanèètù Neville. Ndi ne disànkà dyàbúngì dyà kwikala kaaba aka, Mwanèètù Neville, ne—ne mpungà wa kusòmba cyàkàbidì mu myaba yà mu Dyulu eyi, mu Kilstò Yesù. Kàdi búngì kabùtu buntàcisheku nànsha, bùtu ànu bùnsalula. Nudi bamanyè's, misangu yàbúngì. . . Ndi ntàmba kudyumvwa kwànyì kumbèlu dîbà dîndi ne búngì bukesè, bwalu ke cîndi ngèèla meeji ne ke cidì Èkèleeziyà. Èyowà, ndi ne Mufùndù bwà cyòci aci, wàmba ne: “Kùciinyi to, Kasumbu kakesè kàà mikòòkò, ndiswa dîmpè dyà Taatù wenù—wenù bwà kunùpèèsha Bukalenge.” Nènku mvwa njinga. . . aku ke Kasumbu kakesè kàndi njinga kwikala mubadiibwemù ditùkù adi, kààkambilàYe ne: “Kùciinyi to aku.” Ne tudi ne disànkà dyàbúngì bwà dyèsè dyà kulwa dilòòlò edi.

2 Nènku ncìvwa mulwè ne meeji à kwakula to. Ànu mu katanci kakesè emu kùvwa muntu kampànda uvwa mulwè ku ciibi, nènku mpàmvwà mu dilonga kampànda, ngènda ndongolola dyumvwija kampànda bwà cyena-bwalu kampànda cîndi njinga kukwàta naaci mudimu mu matùku makese emu mu masangisha àlwalwà kumpàla eku à mu Phoenix ne mu Tucson, ne kuntu kwònsò aku. Nènku mvwa ngènda ntàmba kudiishiiibwa mu Nyumà, nudi bamanyè's, ne bintu bìmpè byà Nzambì, pa bidì bitàngilà Nkàmisha, ne cyena-bwalu pa *Nkàmisha*. Ki mukàjàànyì kulwa kungambila ne kùvwa muntu kampànda mulwè bwà kumòngana naanyì, ne ncìvwa—ncìvwa mucyumvwe ànu bìmpè to, nènku pashiishe, mòna's, yèyè kwamba ne: “Neùye mu èkèleeziyà dilòòlò edi anyi?”

3 Ki mèmè ne: “Ndi ngèèla meeji nànkù.” Ki mèmè kutungunuka ne kuteeta bwà kulama nyumà wa cîmvwà ngènta aci. Ke kupinganayè wàmba ne kùvwa muntu mulùme mubèèdi uvwa ulwa bwà kumusambidila. Mèmè ne: “Èè, dîbà adi, nènnyè mu èkèleeziyà, nànsha bishi, nwamònu's, byòbì ne mbwà kusambidila babèèdi.” Ntu misangu yònsò, aci. . . Nudi bamanyè's, bintu abi bitu. . . bìvwa bìkèngela twètù kufikakù ne lùkàsà lwònsò dîbà didi bantu bàsaama ne biikàle mu lukèngelu. Yònsò ukààdikù musaame mmumanyè mwà kwanyisha cidì kwikala mwondòpiibwe kùdi bukolè bunène bwà Nzambì bwà lwondapu. Ne bulenga menemene bùdici, ndyèsè kaayìpu's wè.

4 Mpindyewu, mu dyàlumingu dilwalwà edi, bu Mukalenge mwà kwanyisha, Mwanèètù Neville ne nànsha umwe wa kùdìbo kèna ne cintu cyà pawwàci to, mvwa ndyàmbedila ne dyàlumingu dyàlondà mu dindà mèmè—mèmè nèntwàdilè bantu diyiisha dyànyì dyà Noël, bwalu kubàlekela—kubàlekela. . . Bàmwè bàà kùdìbo mbafumine kule, nudi bamanyè's, ne bu mùdì Géorgie ne

myaba mishiiłlëshiiłlàngane, ne aci necyenze ne bàalukile pa dîbà bwà kusumbàbo bintu byàbò byà Noël ne bikwàbò.

⁵ Ki Billy kupàtuka kundondela, wàmba ne mwakùnyànyì wa bakàjì, Delores, dyàlumingu dyàlondà dilòòlò ànu kumpàla kwà disangisha, ùdi ne ndambù wa—wa màtàbishì makesè bwà bânà, ndongamu mukesè mwaba ewu wikalabò mwà kulonda, nudi bamanyè's, dinàya dikesè dyà Noël didìbo baswè kutèeka kumpàla kwa masangisha kutwàdijawù. Ki mémè kwamba ne: “Èè, aci's neciikalè mu dyàlumingu dilòòlò kî mmwòmù anyi?”

Yèyè ne: “Èyowà.”

Mémè kwamba ne: “Aci kacyakupangishakù to nànsha kakesè, dîbà adi.”

⁶ Mpindyewu, nwamònu's, diibìdì dilwalwà mmulààdilu wà Noël, pashìshe piikalà. . . anyi diibìdì dilwalwà, lumingu paanyimà, ndyà Noël. Pa nàнку aci necilwijakaje bantu, nudi bamòne's, ne dîba adi nebiiikalè ne cyà kwalukila kumbèlu dyà mulààdilu wà Noël adi, nènku mu òmwè's, pa nàнку mémè kudyàmbidila ne ndi. . . èyowà, mbingu yibidì. Ncyà bushùwà, mbingu yibidì mmwòmù. Ki mémè kudyàmbidila ne pàmwàpa ndi mwà kulwa dilòòlò edi ne kumanyisha bantu, bu Mukalenge mwà kwanyisha, ne Mwanèètù Neville kàyì ne cintu cyà pabwàcì to. Bwà ne, ntu pa ciibidilu muswè kufila diyiisha dyànyì dyà Noël kùdì èkèleeziyà, ne diyiisha dyànyì dyà Paasàkà, ne cyònsò cìdì Mukalenge ùtèeka pa mwoyi wànyì bwà kufila aci. Nènku mu dyàlumingu dilwalwà edi, bu Mukalenge mwà kwanyisha, mu dyàlumingu dilwalwà mu dindà ndi mfilà. . .

⁷ Kabingilà kàdì kenza ne ncyangàtà bwà mu dindà pamutù pàà dilòòlò, mùdì bantu bàdì bàfùmìna kule, bàdì ne mapingaja ònsò awu bwà kwenza lwendu bwà bààmòna mwà kufika kumbèlu, nudi numòna's. Nènku mwà kutamba kujinga kuàtèeka dilòòlò, ndi ngèela meeji ne dilòòlò nditàmbe bwìmpè. Ndi—ndi munangè disangisha dyà dilòòlò, pàdì dîbà dîbwela apu, cintu kampànda, cikwàbò. Úwà n'Nzambì mu budimì bwà Edènà, kùdì Adàmà, ùwà mwà kubànda mu cyashima cyà dilòòlò ne kwakula ne Adàmà. Nwamònu's, ne mémè ntu munange disangisha dyà dilòòlò. Kàdì, ne mùshindù wùdì maalu miikala kaaba aka, bwà ne bìwva bifwànyine kwikala bitàmbe bwìmpè bu mémè mwà kuènza mu dindà, bwà bantu bààmòna mwà kuumuka.

⁸ Nènku ndi ne kusàkidila mùdì tabernacle mwikàle wènda wàlabala mwab'ewu ukabwela too ne kupita mwaba ùtùdì ewu, mwikàle ne mwaba musàkidilaku. Paanyimà pàà dilubakana ne cimvundù cyònsò, ndekeelu wa byònsò twamupecì ànu dimupeta. Nudi bamanyè's, Mwanèètù mununu Bosworth ùwà ne ciibidilu cyà kunèka, wàmba ne: “Mwànà wa mu dibòkò udi udila bikolè menemene awu ke udibò bàtàmba kutàbaleela bikolè.” Pa nàнку aci ncyenze bu ne ke mùdibì, nudi bamanyè's,

ne pa nàнку ndi ngèèla meeji ne bidi bitwènzela bîmpè bwà kudilaku ndambù ku musangu ne ku musangu, kanwèna nwela meeji nàнку awu anyi?

⁹ Pa nàнку, ndi muswè kwela nsèkè pa méyi mamba kùdi Mwanèètù Anthony ne baambulushanganyi nendè mwab'ewu bwà mùjiki mulenga awu. Ànu pangábwedi apu mèmè kuwùtèèleja. Nènku, nudi bamanyè's, byombelu abi mmpungi's. Mvwa muswè bwà umwe wa ku bânà bànyì, nànsha umwe wa ku bôbò, ikalèku wimba mpungi, ndi—ndi . . . ne byombelu byà bìvumija lupeepà abi.

¹⁰ Becky ùvwa mutwàdije kwimba pyàno, kàdi ùdi ku mbangilu kwa bunsonga aku's, nudi bamanyè, mmùmwe ne, mmuswè kulekela dimwimba mpindyewu. Nènku—nènku wàkabanga . . . Mulongeshi ùvwa mwambè ne bàvwa ne cyà kubanga mìjiki yà bantu bônso. To, mpindyewu, ncyèna muswè kwamba . . . nudi bamanyè cìndi muswè kwamba, mbwelelu, ne bikwàbò, byà mìjiki yà kapelu abi, bwà kubìbweja mu mìjiki yà ntèndeleeu. Pààfikàye mu cikadilu cyèndè citumbùke mu cyôci aci, dîbà adi ùdi wèla meeji ne: “Èè, bikèngela ànu ngiimanyikè.” Nènku mèmè—mèmè . . . bânà's nshing'a bàbàdi. Nènku, mu mishindù yónso, cidi ne cyà kwikala dibìikila dyà kùdi Nzambi, bangabanga. Ndi ngèèla meeji ne mwanààbò wa bakàjì, Sarah, udi paanyimà pàpa neàmutàmbè, yéyè mwine, ne kacya kàtuku mupetè dileesònà to. Pa nàнку, nàнку dîbà adi dibìikila dyà Nzambi didi ditàmbe bwìmpè pàdici dipà mùshindù awu.

¹¹ Kàdi mèmè ntu munangè mpungi. Ndi mvùluka pààkalàmbulàbò tabernacle ewu pambèlu lwà mu ditumba mwàmwa, mpungi yàkadila citùpà cijimà cyà ditùkù pambèlu apa ne: “Kwinshì ku nkùrusè kwàkafwilà Musùngidi wanyì, kungàakadila bwà kusùngidiibwa bwà kufwidiibwa luse ku mpèkaatù, kwòkò aku Mashi àkalaabiibwa ku mwoyi wànyì,” pàmvwà ngèèla méyi ànyì mu dibwe dyà mu ditumba.

¹² Kàbidì ndi mvùluka dilòlò kampànda mu èkèleeziyà wa Méthodiste wa Trinité, cikondo cyà Ngàngàbukà wa kale Morrison . . . Bààbùngì bàà kunùdi bàvwa ne mwoyi kale mu matùkù àànyì mbavùlùke Ngàngàbukà Morrison, munsantu wa kale. Asbury mmujimije umwe wà ku bantu batàmbè bunène kacya Asbury wikalakù, pààkajìmijàbò Ngàngàbukà Morrison, mu cikondo cyèndè aci, mununu wa difwàna dyà Nzambi. Nènku misangu yónso mvwa muswè kwikala mmuteèleja ùyiisha. Kàbidì mvwa muyè kuntu kwàka bwà kumutèèleja ku èkèleeziyà wa Méthodiste wa Trinité. Nènku dilòlò adi, bansongàalùmè bàbidì kubwelabù mu cisàsà cikesè ànu pàtùvwà twenda tubànda mukàjàànyì ne mèmè, ne bàvwa bèle mpungi yàbò muulu mùshindù awu, ne byôbi byombelu abi, ne kubìmbabò ne: “Ku nkùrusè kwàkafwilà Musùngidi wanyì!” Nkùrusè munène awu mubàndisha ku lusongo, bènda bànyùngulukilakù. Ki mèmè kwimana ànu mu mùsèèsù ne kwela byanza byànyì muulu,

mémè e kubanga ànu kutùmbisha Nzambì ne díyì dikolè. Ncìvwa mwà kudikànda to.

¹³ Kùdi disaluka dyà mùshindù kampànda munda mwà mwena Kilistò mulediìbwe cyàkàbìdì, pàdìDi dilàkuka, kùdi cintu kampànda cidì ne cyà kwenzeka, ke cyònsò cidìku aci. Kaa, mémè...Kakwèna cintu nànsha cìmwè bu mwena Kilistò wa kale nànsha. Ncyà bushùwà. Katwèna mwà kwangata nànsha cinyi pa kaaba kààci to, dilabula dyànyì, kadyèna mwà kucishintakaja ne mabanji kanà ónsò à pa buloba, anyi ne buloba bujimà, anyi ne ndongolwelu yònsò wa bukwà mabùlungù ne byònsò nànsha, bwà bìdì Yesù mundongèshe bwà bwalu Bwèndè Yèyè mwinè.

¹⁴ Kùdi muntu kampànda udi musòmbe neetù, musangu wònsò wùndì ntàngila paanyimà mwoyi wànyì ùdi wùtùpika. Mmuntu ùmvwà mumòne wàngata mèèsà à Mukalenge, dilòlò adi, wèndela ku mabaya à balèma. Muntu ùkadikù kacya mukwambile ne wèwè udi mufwànàngàne ne Oral Roberts anyi? [Mwanèètù awu ùdi wàmba ne: “Èè, mwanèètù, uvwa mungambile, ànu pangààbwedi mwab’ewu mpindyewu apa. Ndi mwindìle bwà wèwè kucìjingulula.”—Muf.] Ndi nnwàmabila, musangu wònsò wùndì...Mbanganyì...Nukààdikù bamòne Oral Roberts, pàmwe ne nwènu bònsò. Ní kí mmufwànàngàne ne Oral Roberts! Mvwa ànu ngèza e kutàngila paanyimà. Nènku ndi—ndi ngèèla meeji ne yèyè mmuntu munènekù kupita Oral ndambu’s. Kàdi ànu pa kutàngila mùshindù ùdiye ùsaamuna nsukì yèndè, ne mpàla wèndè ne lukebu lwèndè, ne misangu yònsò ùmwèka muntu wa luumu, ùsòmba bu Oral. Ne pa nànkù ntu—ntu ndyàmbidila misangu yònsò ne: “M’Mwanèètù Oral anyi?” Ùdi ùmwèka ànu bu yèyè.

¹⁵ Mwanèètù Oral ùdi ùbanga cilongelu cyà mùshindù kampànda cyà Bible kuntu kwàka mpindyewu, ngèèla meeji, anyi cintu kampànda. Mvwa muumvwe bàmba bwà cyòci aci ditùkù adi. Ncinyi ciinè aci? [Mwanèètù Neville udi wàmba ne: “Cilongelu cyà nkònga myandà.”—Muf.] Cilongelu cyà nkònga myanda. Èyowà. Mwanèètù Carl Williams ngumwe wa ku bèndè bàdiye mweyèmène, mu mùshindù kampànda, ncyèna mumanyè ànu cidìci mpindyewu to.

¹⁶ Mpindyewu, mpindyewu vùlukààyi ne, mu dyàlumingu, bu Mukalenge mwà kwanyisha, netùbangè, ndi ne Paasàkà... anyi diyiiisha dyà Noél. Nènku pashìshe ndi—ndi ne kusàkidila bwà mùdì tabernacle ewu mubangùbwe. Nènku díbà adi ndi ntèkemena ne eci kacýàkwikala ànu kusàkidila ku búngì bwètù to, kàdi neciìkalè kusàkidila ku ngàsà wapeèsha Nzambì èkèleeziyà wetù, nkwaka wetù, wetù...kí nkwaka to, kàdi disangisha dyètù ditùdì badisangìshemu pàmwe edi. Tudi badinangè.

¹⁷ Nènku—nènku mvwa muswè ànu kwamba eci.

Ncyàkwangata díbà dyàbúngì to. Kàdi, ndi ne bintu byàbúngì bimvwà ne cyàkwamba, kàdi ncyèna mbyàmba to, mbifwànyine kwangata díbà dyàbúngì. Kàdi, ndi muswè kwamba nùku, ncintu cìndì nciyì mwà kwamba to. Kùdi bintu (muntu yònsò mmùmvwè) byùdi mumanyè, ne mmu Dìna dyà Mukalenge, nànsha nànkù kùyi mwà kucyàmba to. Nudi numòna's, udi ne cyà kubilama bwèbe nkààyèbè. Nwamònu anyi? Kàdi búngà bwalu bwà mikùkùkù bùdi bwènda bùseemena, ne kùkaadi matùkù ndambù, bùdi bwàmba kwenzeka, bùmvwà mudimwishiibwe bwà kutàbaleela Nyumà Mwímpè ùkwàta mudimu munkaci mwà bantu mu cipidi aci, ne bóbò kabàyi bamanyè cintu nànsha cimwè cyà pa buloba to, nwamònu's, kàdi mmòna Nyumà Mwímpè ùkwàta mudimu ku cyòci aci. Nèncibuululè, bu Mukalenge mwà kwanyisha, cikondo cikùmbàne. Mpindyewu, vùlukàayi ne, aci cidi cìleeja Nzambì munkaci mwàbò.

¹⁸ Bu mùvwà muntu kampànda, ngèela meeji, mwanèètù, èyowà, ùvwà mwàmbè kùkaadi matùkù, Mwanèètù Neville ùvwà mwàmbè ne: “Nzambì, kàyi ùbala cimvundù cyètù—cyètù cidì munkaci mwètù, diditwàlà dyètù dibi ku mèsù Kwèndè.” Bwà ne mwena lùmònu wàkaya kwosha dísù pa Izàlèlèlè, ne uvwa mwà kumumòna ne dísù dyà mubidi, mùvwàbi bimwèka ne kàvwa mu bulongàme, ne mùshindù ùvwàbo benze bibì ne mùvwàbo bafwànyine kwediibwa mulawu. Kàdi cyàkapanga mwèpiskòpò awu kumòna cìvwa n'Lubwebwe lutuuta alu ne Nyòka wa Cyamù cyà kabanda awu, nwamònu's, wènzà difuta dyà cibawu. Pa nànkù, nudi numòna's, pàà—pààkatàngila Baalàmà Izàlèlèlè, kumònaye kabingilà kampànda kàà kubèelela mulawu. Nwamònu anyi? Kàdi pààkabàtàngila Nzambì, wàkamòna difuta dyà cibawu. KwambaYè ne: “Nudi bu mùdi kabalù kàà lusèngu lùmwè.” Amen. “Nganyì udi mwà kutèeka cintu kanà cyònsò mu njila wenù? Mùshindù mwìnè ùdi ntentà yèbè ne difwàna dyà Nzambì, mùdiyi myakàne's wè!” Ke mùshindù ùvwà Nzambì ùbàmòna. Nwamònu anyi? Kabìyi mùshindù ùvwà muntu ùbàmòna to, kabìyi mùshindù ùvwà ba—bantu banène bàà bunèmè bàbàmòna to; kàdi mùshindù ùvwà Yèyè ùbàmòna.

¹⁹ Nènku, Éyi Nzambì, swàkù aci cìikalè cyànyì citùpà! Swàkù aci cìikalè cyànyì citùpà, bwalu ncyènà ne cintu nànsha cimwè munda mwànyì cìmvwà mwà kwamba to. “Ncyènà mutwàle cintu nànsha cimwè mu cyanza cyànyì to, ndi mukwàte ànu ku nkùrusè Webè.” Nwamònu's, aci ke cyònsò citùdi naaci.

²⁰ Èè, edi ndilòlò dyà disangisha dyà milòmbò, anyì kì ndilòlò dyà disangisha dyà milòmbò to, kàdi eci ncyènze bu kasumbù kàà ditangalaja dyà luumù lwimpè mwab'ewu. Tudi—tudi baswè kutèeka Dìyi. Ne pàmwàpa ndi mufwànyine kwakula neenù dilòlò edi bwà tusunsa tukesè cyanàana. Bààbúngì bàà kunùdi bàdi baswè kubuulula mu Mifundu... Èè, nudi bamanyè's, cintu cidì cìkèmesha ncyà ne, ncibuululùka ànu

pôpù menemene, pa mufundu úmvwà ne cyà kubala. Èyowà, mukalenge. Bikèmesha. Mùvwa mmu Kolintò wa Kumpàla, nshapità wa 11, ne túngà tuntu túmvwà mufunde kaaba aka, mwaba kampànda mwab'ewu, túmvwà ngèèlanganapù meeji, ní ndi mwà kutùpetaku ànu mpindyewu ewu, pa Kolintò wa Kumpàla, nshapità wa—wa—wa 11. Nyéyè ewu apa mene, ànu apa mene. Èyowà's, mukalenge.

²¹ Mpindyewu, kumpàla kwà kuseemena ku Dìyì, twànji kuseemenaayi kùdì MwenaDì, nwamònu's, Yéyè udi Dìyì awu, bwà twamòna mwà kulòmba luse ne bwà mabenesha Èndè patùdì tuMulonga Yéyè udi Dìyì apa. Tùsambilàayi.

²² Éyi Mukalenge Nzambì, múle tèntè ne ngàsà ne luse, Wèwè utu muswè munda mwà bikondo, paanyimà pà muntu mumanè kwenza mpèkaatù ne mutèèke dijimbà dinène adi pankaci pèndè ne Wèwè, òvwàye kàyì mwà kusambuka yéyè nkàayèndè nànsha. Kakùyì mpatà to, yéyè úvwa mujimine menemene, kàyì ne njila wa kwalukidila nànsha. Kàdi Nzambì wa. . . múle tèntè ne ngàsà yònsò, úvwa muswè kwangata Mupinganyi pa kaaba kèndè, ne kumwaluja. Aci citu cinyùkùshe myoyi yà bònsò bàtù bakumanyè Wèwè, Mukalenge, mùshindù mwinè uWàkangata Mupinganyi awu mu dinanga Dyèbè dinène ne ngàsà's wè! Nènku ànu mutùdì tufùma ku dicyàmbe, Mukalenge, mpà yéyè Mupinganyi awu patùdì tushindameena dilòlò edi, Mwinè Wàkafwà pamutù pèètù twètù bangènzàmpèkàatù awu, mwakàne Awu Wàkambula bubì bwètù pambidì Pèndè. Yéyè ngutùdì tweyemena.

²³ Mpindyewu tùlwàlwa ku Dìyì Dyèndè kakùyì tuseku to, ne myoyi ne mitù miinyika, ne kaneemu katàmbe ne mu kaneemu ne mu dyanyisha. Ne tulòmba bwà Wèwè kutùtùminakù dilòlò edi, ngàsà, ku Nyumà Mwímpè, ne watùpèèshakù Dyàmpà dyà—dyà Mwoyi ditùdì tukèngela bwà kutùkànkamikadi. Wèwè udi mumanyè menemene citùdì tukèngela, ne tudi bamanyè ne Wèwè wakalaya ne twètù balòmbè netùpetè.

²⁴ Tudi bafwànyine kuvùluka dilòlò edi, Mukalenge, bònsò batùdì bamanyè ne mbabèèdi ne biikàle mu lukèngelu abu, bwà ngàsà wa Nzambì wàfidiibwa kùdìbo mu búngì bwèndè. Nènku, Taatù, tudi tulòmba bwà aba bàdì badishinde, bwà ne diikisha dilwalwà edi dyàtwàlaku civùlukilu mu mwoyi wàbò, bwà ne kuumukila kumwaba úvwàbo musangu kampànda awu, ne badishinde bapàtùke mu mwaba wà bwobùmwè Bwèbè. Nzambì, tudi tulòmba bwà bààlùkile (enzaku nànkù, Mukalenge), bààlùkile ku disangisha, ku—ku Disangisha dyà Bânàbutè, bààlùkile ku mwaba wùdì ngàsà ne luse, ne dinanga ne musàngèelu, ne dyondopiibwa dyà misùùkà yètù, meeji ètù ne mibidi yètù. Enzàku nànkù, Mukalenge. Bèneshaàku Dìyì dilòlò edi. Tùkànkàmikaaku bònsò, ne tùpèèshaaku mabènesha Èbè, bu mutùdì tulòmba nùnkù mu Dìnà dyà Yesù. Amen.

25 Mpindyewu, ànu bwà katanci kakesè cyanaànà ndi njinga kukòka ntèmà yènu ku Kolintò wa Kumpàla, nshapità wa 11, mvensà wa 23, wa 24, ne wa 25.

Bwalu ndi mupetè kùdì Mukalenge cindì mèmè pàanyi munùsambùlùjìle aci ne, Mukalenge Yesù mu bufùkù bùmwebùmwe bwàkamutungilabo abu wàkangata dyàmpà:

Nènku pàakamanàye kusàkidila, wàkadìcibula, e kwambayè ne: Angàtaayi, nùdye: eci mmubidi wànyi, wùdì mucìbùdùbwe bwà bwalu bwènu: enzàayi nùnkù bwà kumvùluka.

Byà mwomùmwe kàbidì yèyè wàkangata lupànza, ne pàakamanàye kudyà, wamba ne: Lupànza elu ncipungidi cipyacipyà mu mashi ànyi: enzàayi nùnkù, misangu yònsò yinùdì nulùmwa, bwà kumvùluka.

26 Ní ndikù mwà kubiikila cyòci eci bu cyena bwalu cikesè cindì mwà kujinga kwelelaku meeji, cidi mwà kwikala ne: *Kuvùluka Mukalenge*. Cidi cyùmvwika bu butùkù bývwa... anyi diyiisha divwà ne cyà kwikala diyiishìbwè mu dyàlumingu dishàale edi, mu didyà dyà Mèsà à Mukalenge. Kàdi ndi muswè kucyàngacila mu cibadi cishiilàngàne ndambù bwà tusunsa tukesè, patùdì twenda tuteeka meeji èètù—èètù kaaba kàmwe apa, mu dikuukwila dyà Mukalenge.

27 Tuvwa, mu bushùwà bwà bwalu, mwà kutwàdija ne mèèsà à Mukalenge, bwalu awu mmwaba mwìmpè utùdì bònsò tuvùluka. Kuvùluka Mukalenge ku mèèsà Èndè, miinè awu, mu bulelèlà, cyena bwalu ncítàngilekù. Kàdi, aci's, Pòlò ngwàkamba ne tudi ne cyà kwangata lupànza ne—ne kunwà ma—mashi, ne kudyà dyàmpà dyùmè, mu civùlukilu, bwà kuvùluka cyàkatwenzelàYe. Nènku panùdì—panùdì nucyènza, kanùcyenjì bu cintu cyà ciibidilu, cyà matùkù ònsò nànsha; bikengela nùlwa bulelèlà, nuvùluka Mukalenge. Nwamònu anyi? Kuvùluka ne civwa ngàsà Wendè ne luse Lwèndè, ne ànu cyòci aci nkàayaci, cidi cinùpèèsha ditèkemena dinùdì naadi. Nànsha nwènu bafwànyine kwikala bènze cinyi, kawkwèna mwaba nànsha ùmwè cintu cidìku ní mmu mishindù kaayi mwà kusemena pabwìpi ne civwa Kilistò mwènzè bwènu to.

28 Mwawa mulabùle cintu cyà dibungama lumingu elu, cikòlà ciikàle cyà butùmbi, mmumvwà mwà kucibiikila, ndi mujiike mwanèètù wa balùme uvwa usòmbaku neetù mwab'ewu. Nènku bààbúngì bàà kunùdì mbamanye bwalu abu. Úvwa mMwanèètù wa ngàsà Rogers, Busty Rogers, bu mutùvwà tumubiikila, Everett. Nènku Mwanèètù Banks Wood ewu, ne Mwanèètù Sothmann, twètù kuya pàmwe ku diyiisha dyà mu madilu.

29 Ki—ki mèmè kuditwa mu dyendeshila màshinyi mu nêjè, mu mwaba wa kale wùmvwà mumujiike dyàmbedi, kùkaadi bidimu bitwè ku makumi àbidì ne bitaanu. Dìbà adi pangàakamujiika,

civwa mmu mâyi à bitoci, mu Dîna dyà Mukalenge Yesù Kilistò. Patùvwà twenda tusambuka cilamba cyà ciibidilu cyà kale ku Totten Ford kwàka, mvwa ngènda ngàmbila bânà bèètù, mbàmbila ne: “Dîngà ditùkù pàvwà mwambi kampànda wà cyena màngumba ùvwa mwase nte—ntentà munène kuntwaku, kwambayè ne: ‘Kenji kàà maalu makodyàkàne ku èkèleeziyà wa ba-Baptiste kwaka, kàdì kàbàtiiza bantu mu Dîna dyà Yesù Kilistò aku,’ kwambayè ne: ‘bu muntu mwine ànu mubàtijiibwe mùshindù awu, kî mmufwànyine nànsha kwikala mwakidiibwe bìmpè mu ntentà wanyì to.’”

³⁰ Nènku mu cikondo aci kwenzekabi ne kwikalè bàmwè bantu basòmbe mwaba awu bàvwà babàtijiibwe mu Dîna dyà Mukalenge Yesù, ne awu ùvwa m’Mwanèètù George Wright ne dîkù dyèndè. Bàvwa ànu . . . Cintu cimwèpelè civwàbo mwà kwenza civwa ncyà kubènga kwalukila.

³¹ Pa nànkù ditùkù adi ku musùlù, kaa, wàkalekela ànu disangisha dyèndè kulwayè mwenze bu udi ulwa kubandila, ne disangisha dyèndè divwa diimàne mwaba awu. Ki mèmè kuya mwaba awu. Nènku mvùla ùvwa mulòke ku tukùnà aku, mu mpàta yà bitoci ayi ne mubipwekesha, tusùlù twàwù tukesè tùvwa tuwìjè musùlu wà Blue River ne bitoci menemene. Mèmè e kubwela mu mâyi, manshùikidile mu cimònu emu. Ki mèmè . . . Umwe wa ku balubuludi, anyì balami, èyowà’s wè, kumpèeshayè Bible, ne mèmè kubala mwaba ùdi Peetèlò mwàmbè mu Ditùkù dyà Mpenta ne: “Nyingàlalaayi, muntu ne muntu wa kunùdi, ne bwà kubàtijiibwa mu Dîna dyà Yesù Kilistò bwà dilekelediibwa dyà mpèkaatù, ne nenùpetè dipà dyà Nyumà Mwímpè.”

³² Ki ditùkù divwà Georgie Carter mulàale mwaba awu, ùteeta kajuula byanza byèndè, mwikalè ne bujitu ànu bwà kilò mitwè ku makumi àbidì ne yibidì ne byà pamutù, mwenze bidimu citèemà ne ngondo mwandamukùlù mu bulàalu, kàyì ùnyunga to. Nènku beena kwàbò, èkèleeziyà ùvwayè ùsanganyiibwa, bàvwa bambe ne: bu muntu mwà kulwa mu masangisha ànyì, ùvwa mufwànyine kwipaciibwa mu bwobùmwè bwàbò mu èkèleeziyà. Nènku mùvwa mmu dilòlò dimwèdimwè adi mwàkondopiibwàye pa cibànzà. Ki dîbà adi yèyè kujinga bwà kubàtijiibwa bu mwànà wa bakàji mutekète ewu Nail uvwa kuntu kwàka; mwena cikèènà-kumòna cingàakamòna, ne nwènu nudi bamanyè bwalu-bulonda abu, byanza byèndè ne mikòlò bìvwa byuminyine; nènku mèmè kubwela mu cikèènà-kumòna ne bukòlè bwà Nyumà, kumutentekela byanza, ki yèyè kupàtukamù ne kwondopiibwa. Ne pa nankù ùvwa wa mu yèyè umweumwe awu. Èè, ùvwa ng’èkèleeziyà wa ba-Méthodistes. Mwambi wa ba-Méthodistes, Mwanèètù Smith, yèyè ke uvwa mwimàne ku mwelelu wa mâyi aku ne disangisha dyèndè.

³³ Ki mèmè kubanga kubàtiiza dibàtiiza dyà bwena Kilistò, dyà mu Bible. Ànu dîbà dínkaavwà mubàtiize bantu bàtaanu anyì bàsambòmbò, dyàkàmwè ke bantu kupàtukabu mu milongo

ne byônsò, pa kakùnà apu. Ki musùmbà wa ba-Méthodistes ulwàlwà ewu ne bilàmbà byàbò bimpè bivwàla pambidi, bwà kubàtijiibwabò mu Dìnà dyà Mukalenge Yesù. Nànku ku umwe ku umwe, bainábànza balwàte bivwàlù byàbò byà swà byà muvù wà luuyà abi, bàbwela naabi mu bitoci amu, bènda bàkùpula binsònji ku mèsù, tupenta twà ku mishiku tùumuka, bènda bàlwa bwà—bwà kwenza—kwenza ditonda ne—ne kubàtijiibwa.

³⁴ Nènku mu wôwò musùmbà awu, muntu mulùme, wà dikàndà, wa makaaya maalàbàle, mukòsèshe nsuki bu yà GI, wa kwisù kwalàbàle, ùmwèka muntu mupàyàme kupàtukayè muntu amu muvwàle nkooçi wendè mwimpè kumòna wa bleu mutwile. Kwabayè ne: “Ne mèmè, pàanyi, ndi mwangàte dyànyì dipàngadika.” Mwinè awu ùvwà Busty Rogers, kakùyì muntu mumwambile cintu nànsha cimwè to. Mwaba awu ki mèmè kumujiika mu Dìnà dyà Mukalenge Yesù Kilistò, pa ditonda dyèndè.

³⁵ Kàdi lumingu lushààle elu mèmè kumwela mu malaba ku Milltown. Ki mèmè kwakula pa diyiiisha dyà ne: *Bupwàngàne Bwà Dibiikà Dyà Ku Lufù*. Ntu mpandànjlà, ne mumòna nzambi mishiiàngàne ne beena nkindi; nènku ke cyònsò cidiku aci, pa kuumusha bwena Kilistò, cidi ànu nkindi pa yôyi, mùshindù ùdibo biitabuujà *cikampànda*, *cikansanga* anyi *cikankènga*. Kàdi Mufùki munène Wàkenza bufùki awu! Kùdi ne cyà kwikala Mufùki piikalàku bufùki. Nènku piikalàku bufùki, bùvwà bwenjiibwe kùdi Mufùki. Nènku mudimu wà muntu kanà yònsò ewu ùdi ùmuleeja. Yèyè mmutèngi mwimpè wa nzùbu, ùdi wènza mudimu mwimpè, ùdi wibaka. Nènku piikalàye mulongolodi mwimpè wa byamù, ùdi wènza mudimu mwimpè. Mudimu wèbè ùdi ànu ùleeja cyùdi. Ne bufùki bwà Nzambi bùdi bùleeja Nzambi. Nènku Nzambi wàkafùka cintu cyònsò bwà kiipàcilà kampànda. Ne cintu cyònsò cidi cikùmbaja kiipàcilà Nzambi, pàdici cifwa, cidi ne dibiikà dyà ku lufù. Ngambilaayikù cintu cimwè. Ki mèmè kwakula pa bintu byàbùngì, bu mùdi bilòngò ne mici.

³⁶ Ne mùdi díbà dibànda mu dindà, bu mwànà mutekète mulediibwe, nsèsà yàdi ayi, mmitekète. Patùdi twamba kufika pa díbà dikumi jaajaaja, mmmwànà wa citende. Ne pa díbà dikumi ne yibidi jaajaaja didi dikenka mu bukolè bwàdi, mu bulenga bwà bukàji anyi bulùme. Kàdi bu pa díbà ibidi jaajaaja wa mapingaja nànkù awu, didi dilwa bukolè bwànyì ebu. Nènku bu pa díbà itaanu wa dilòlò nànkù, didi dilwa bu kaakù, didi dyènda dibwela. Ne ndekeelu wa byònsò nsèsà yàdi yidi yitalala mu buloba, ne dyumba difwa. Aci ndekeelu wadi anyi? Divwa dikùmbàje kiipàcilà kàà Nzambi. Divwa ditòlwèshe mwoyi wà bukwàmici pàdidi dipicile pa buloba. Bikùnyiiibwà byònsò bivwà mwà kwikala bifwè cidimu cishààle, ndibibiishe. Aci ndekeelu wadi pàdidi dikùmbàje kiipàcila kàà Nzambi apu anyi? Didi dipàtuka kàbidi dindà didi dilonda, ne mwoyi

mupyamùpyà! Muci wònsò ùdi wenza cintu cìmwècìmwè aci, bikwàbò byònsò, bintu byònsò, ngondo, mitootò, ndongolwelu wa bukwà-mabùlungà, milayì yònsò.

³⁷ Nènkù muntu yèyè mukùmbàje kiipàcìlà kàà Nzambi, kùdi dibìikà dyà ku lufù dyà cyà bushùwà ànu bu cintu kanà cyònsò eci. Cintu cìmwèpelè cìdidi ne cyà kwenza, ncyà ne, Nzambi ùdi ànu mwindile cikondo, ànu mùdiYe mwindile mpindyewu emu.

³⁸ Mabèji manène afùmu ku dipòòpòka ku mici, anyi, mamatè's. Mwaba ùvwà makünze, à màyi à matàmbà, à bleu, à mafìkùlùke, à meekala ónsò mashiilàngàne maalàbàla pa buloba, mwaba ùvwà bufùki bwà Nzambi bulàale bufwè mwinshì mwàbò, ki Nzambi kutèekayè cikùtù Cyèndè cyà bilòngò. Kàdi Yèyè mmumanyè díbà didìYe ùtèeka cikùtù cyà bilòngò aci, kùdi dibìikà dyà ku lufù mu movù wà bintu bitòloka! Buloba bùdi ànu ne cyà kunyùngùlukila mpoko wabò too ne mùdibo bwàlukila buludì pàmwè ne díbà cyàkàbìdi, ne nebùbiike mu bilòngò byà madilu.

³⁹ Kwàmbikù ne: “Eci ndekeelu” to, ànu mùdi mabèji, àdi múmè ku mucì, kaàyi mwà kwamba ne eci ndekeelu nànsha. Cintu cìmwèpelè cìdibu ne cyà kwenza, ncyà ne dilondangana dyà cikondo cyà Nzambi dìnyùnguluke, too ne ku cikondo cyà dilwa dyà Mwànà wa Nzambi. Ne cifukìibwà cyònsò cidi ne mwoyi cìtùku cifwè mu Kilistò necipàtukè cyàkàbìdi. Mu Bwikadi Bwèndè, mu diMuvùluka. Kaa, pàngààfikà ku ndekeelu wa njila wanyi, ndi muswè kufwila mu Bwikadi Bwèndè, mwikale mMuvùluka, ne Yèyè ùdi dibìikà dyà ku lufù ne Mwoyi. Yèyè ngudi Yèyè awu.

⁴⁰ Díbà adi patùdi tulwa ku Mèsà à Mukalenge. Mèsà à Mukalenge, múmwà muwumvwije mwaba ewu kumpàla, kaèna...Tudi twitabuujà ne citùdi tubiikila “mèèsà à Mukalenge” aci ndya—ndyngata dyà dyàmpà. Tudi tutèeka cintu cibi—ci—cibi...Tudi tutèeka cintu cimpè pa kaaba kabi. Cìdi ne mushinga kì ndyàmpà to, kì mvinyò udi ne mushinga to, aci ndyàmpà dyùmè ne mvinyò. Kàdi cintu cìdi ne, cìdi, *bwobùmwe* mbwena kwamba ne “kwakula ne,” ne, mu kwakula Nèndè, nuMuvùluka. Ndi ngèela méeji ne ncikondo citàmbe kubèneshiibwa cyà mu masangisha. Nwamònu anyi? Díbà dyònsò dyà mwoyi wètù divwa ne cyà kwikala Bwobùmwe.

⁴¹ Bwobùmwe ne Mukalenge mbwenzè ànu bu mwaba wà màyi wà mu cipèèlà. Mbyenzè ànu bu mushimì wà màyi mwinshì mwà dijiba, mwàba ùdi mwena—mwena lwendu ùpicila, wìmana ne ùnwa màyi too ne mùdiye ùmana nyòtà yèndè. Aci's ke kuvùluka Mukalenge aku. Úlwa ku dìyi ditùma dyà mèsà Èndè, mwaba ùdi mwena lwendu mupìci udi—udi musòmbèle nèètù, pàmwè, pa buloba, bwà twamòna mwà kulwa ku mèèsà Èndè, ne kunwàku mabènesha Èndè ne ngàsà Wèndè ne Dìyi Dyèndè, mu bwobùmwe mu nyungulukilu wa Dìyi Dyèndè, mu mùshindù

wà too ne mùdi misùùkà yètù yìdi ne nyòtâ eyi yisànkishiibwa. Nènku dîbâ adi tudi tuumuka mu mwaba wâ dikukwila, ne citaleela, basànkishiibwe; tupâtuka bwâ kuya katuutakeena kâbîdi ne maalu à mu cipèèlà, maalu à mu nsòmbelu wa mu cipèèlà. Èyowâ, mwaba ùdi mâyi wâ mu cipèèlà, tupetulula citaleela, tupingana mu twètù, patùdi ne nyòtâ.

⁴² Bivwa ne cyâ kwikala nàнку ne mukukwidi yònsò. Cìdi cisàńki- . . . Bidi nàнку kùdi mukukwidi mulelèlà yònsò, bwâ ne udi ujinga bwâ kudisanga pàmwè. Kùdi cintu kampànda mu bwobùmwè cìdi—cìdi cyâ Nzambi, nceitùmina díyi kùdi Nzambi, ne cyòci aci ncyâ cijila, cijidila. Nènku bakàne bàdi naabù nyòtâ.

⁴³ Ànu mwákambâ Davìdi, ne wèndè “musùùkâ ùvwa ne nyòtâ yâ Nzambi, bu mùvwa ngulungù ùjinga musùlù wâ mâyi.” Kashâ kakesè katâpìke aku kâvwâ mbwa yâ baa bilembi mijoomone nyiinyi mu mbadi aku, ne kiikàle—kiikàle kakutùuka kaye. Nènku nkákù kiimàne, kâpuyakana lùkàsàlùkàsâ ne kâkènzakana. Kwine aku, kâkòka mupùyyà ne cyumvwilu cyâkù cìdi Nzambi mukâpèèshe aci, kâdi mwâ kuumvwa mupùyyâ wâ mâyi mu ntântâ wa kilòmèètâ yâbùngì. Ne kashâale kacya kèèlà mutù wâkù mukesè awu muulu pàdìku munkaci mwâ kuzòna mashì mwoyi wâkù wènda ùpâtuka apu. Kâdi nkamanyè ne, kòkù mwâ kufikakù ànu ku kasùlù kâà mâyi aku, kâdi mwâ kwikala ne mwoyi. Dîbâ adi kakwèna nànsha umwe udi mwâ kukâkwâta to. Kòkù mwâ kufika ànu ku mâyi, kâdi kudinga kabwâ kwònsò kanùdi mwâ kukâtùmina, bwalu nkamanyè ne—ne nkapetè mushìmi mufidì wâ mwoyi.

⁴⁴ Nènku pàdi èkèleeziyâ ùfika mwaba awu, mwaba ùdi Kilistò ne mushinga wâbùngì menemene kutùdi mu mùshindù wâ ne tudi ne nyòtâ yâ kubwela mu Bwikadi Bwèndè ne muntu ne mukwèndè, cintu’s mMushìmi mufidì wâ Mwoyi. Kakwèna dyabùlù udi mwâ kukucimuna to. Nànsha lufù mene nducìmùnyìibwe mwaba awu. Kaa, nditèkemena kaayipu’s wè! Mmwaba kaayipu’s wè! Tupetulula citaleela. Nènku, mu kwenza kwâ nàнку, kuvùluka ne Kilistò nYèyè Wakenza ne cyòci aci cyènzekè bwètù twètù. Ùvwa n’Yèyè Wakenza bintu ebi bwètù twètù, tudi ne cyâ kuMuvùluka. Bwalu, vùlukâayi, kale wâwa tuvwa bàà kwâbèndè ne katùyi Nzambi, Bàà bisâmbâ byâ bèndè, balalula kùdi mpìngù yidi kayiyi yâkula. Kâdi, vùlukâayi ne, Kilistò wâkafwâ kí mbwâ mwena Yudâ to, kâdi bwâ cifùkiibwâ cyònsò cyâ cisâ cyâ Adàmâ cyâkadishinda, ke cyâkafwilâ Kilistò.

⁴⁵ Bu mutùdi tulwa kuMuvùluka ku musùlu Wèndè wâ—wâ bwobùmwè ewu, cìdi—cìdi ne cyâ kutùvùlwija kale wâwa mu cikondo civwâ Izâlèèlà mu lwendu lwàbò. Nènku kulwàbò, baciikàle mu njila wabò wa mudimu, mu njila wabò buumukila mu Èjiipitù batàngile ku dipikudiibwa dyàbò, ku buloba bulaya, nènku, mu cyenzi cyàbò cyâ mudimu, e kudisanganabò kabàyi mâyi. Nènku kwònsò kùvwàbò batàngila kùvwa kùmè ncyóng, mwaba, kwònsò. . . mwinshì mwâ kakùnâ kwònsò kuntwaku

mùvwà ne cyà kwikala tusùlù twà mâyi amu, kamùvwà mâyi to. Nènkù bàvwa munkaci mwà kubùtuka mu cipèèlà. Nènkù pashìishe kumwènekakù Lubwebwe, ne Mòsà kutuuta Lubwebwe alu ne kupàtukamù mâyi ku búngì bwàwò. Mulùme yònsò uvwa ne nyòtà, mukàjì yònsò uvwa ne nyòtà, mwànà, anyi nànsha nyama yònsò uvwa ne nyòtà, ùvwa mwà kunwà mâyi mabòdyòdyòke.

⁴⁶ Mùdì Yone 3.16, cyena-bwalu cyà mushinga mukolè cyà Bible, mwambe ne: “Bu mwàkatàmbà Nzambi kunanga bàà pa buloba, Yèyè wàkafila Mwan’Èndè umwèpelè mulela, bwà ewu yònsò udi witabuuja (witabuuja, ùbwela mu bwobùmwè, ùMuvùluka) kàfù to, kàdì ikalè ne Mwoyi Wà Cyendèlèlè.” Nuvùluka ne Kilistò ùvwa Lubwebwe lwètù lutuuta alu, bwà kusùngila buloba bùvwà bùpùnga ne lufù, bàà Bisàmbà byà bendè bàdì bàpùnga ne lufù, mwena Yudà udi upùnga ne lufù, buloba bùdì bùpùnga ne lufù. Kilistò wàkafila Mwoyi Wèndè ku búngì bwàwù, bwà ne muntu yònsò udi ne nzala ne nyòtà, mwàkamba mupròfetà: “Mònaayi, lwayi ku mpokolo, nùsumbe kùNdì mabèèle ne bwìcì kanùyì nutùùla mushinga.” Lwàyi, bwalu mbwobùmwè, bwelàayi mu divùluka dyà Mukalenge.

⁴⁷ Ndi mwà kwela meeji bwà divùluka dyà Mukalenge cyàkàbìdì pa mwaba wà citaleela, mu ciinà cyà mâyi cidì cibìikidiibwa ne *Beelahàyiiròyi*, cidì cyùmvwija mu mwakulu wà cyena Ebèlù ne: “Ciinà cyà mâyi cyà Ewu udi ne mwoyi ne udi mummòne.” Haga, mumvwa bibì, nànsha nànkù mwikàle mu njila wa mudìmu. Mumvwa bibì, mwangàciibwe bibì, ne mwipàciibwe, kàyi ne mwaba wà kuya to, mwikàle ne mwànà ùpùnga ne lufù, ne mâyi àvwa majike mu mùlàngì. Ne mwànà mukesè awu ùvwa munkaci mwà kudila mwadi. Nènkù ànu mwoyi wà maamù ke ùdì mumanyè ciwva cyumvwija ditèèleja dyà mwadi wà mwànà awu bwà mâyi, mùvwà ludìmì lwèndè lukesè alu lwènda lùwula, ne mishikù yèndè mikwàte cikòbàkòbà, ne mwanèndè awu wènda ùpòyoyonga ku kasunsa kwònsò. Mwipata, mwikale ànu mu njila wa mudìmu, kàyi ne mwaba wà kuya to. Kacìvwa kàbìdì ne cyà ditekemena nànsha, mu yèyè nkààyèndè, too ne mwàkakàminàye dimata dyà ndekeelu pa mishikù yèndè yìvwa mikwàte cikòbàkòbà ayi. Ke díbà adi mu mùlàngì kuamamù ànu ncýòng, e kuwùtèkaye panshi ne kutùngunuka ne lwendu. Kakwàcikwètù kèèla mbilà kàkèba mâyi, ki kutàmbàkù kupòyoyonga; mwinè awu mwanèndè ùmwèpelè mulela.

⁴⁸ Kakùyì mpatà to bwà ne mwoyi wèndè ùvwa kawùyì mwenze bubì awu ùvwa mwà kwela lubilà ne: “Éyì Nzambi, cìndì mwènzè ncinyi? Cìndì mwènzè ncinyi?” Kàdì kàvwa mwà kutwala bwà kumòna mwanèndè ùfwila mu mabòkò èndè to, ki kumulàadikaye mwinshì mwà kaamuci. Nènkù kuyaye bu mu ntàntà wa dibwe dikùpa ne ndundu wa nyuunyi, pàmwàpa ntàntà wa mètres matwè ku makumi citèemà ne umwe anyi

mapite apu, ne kumòna kaci kakesè, e kutwàye binù panshi mwaba awu e kukùtula mwadi. Bwalu yèyè wàkadikonka ne: “Bwà cinyi?” Piikalàye ùvwa mwènzè cívwa cìmpè, bwà cinyi byàkakèngela bwà cintu eci kumulwilaci? Misangu yàbùngì tutu twela meeji nàнку bwà mabèèdi ètù ne ntàtu, nwamònu’s, kàdi pàmwàpa byònsò mbyènzeka bwà kuleeja ngàsà ne luse. Nènku pàvwàye wèla meeji, e kuumvwaye myadi mikesè yà dipùngila ayi mùvwàyi yènda yicyòka, bwà màyi.

49 Kuumvwayè Díyi dyàkula dyàmba ne: “Udi udila mwadi bwà cinyi? Udi udila mwadi bwà cinyi?”

50 Ki kwambulayè mèsù muulu, e kumònayè ciinà cyà màyi cìtùtuka. Kasulù kàà màyi kàà cyashima kaayi’s wè! Beelàhàylòyi, ndi mwà kwikala mucishindùmùne bibì. B, e yibidi, l-à-h-à-y-i-l-ò-y-i, cìdi cyùmvwija ne: “Ciinà cyà màyi cyà ewu udi ne mwoyi ne mummòne! Ewu udi kàyi mwà kufwà to! Melekisedekè! El Shàdda! Ewu udi ne mwoyi ne mummòne, mumanyè majinga ànyi, Mmumvùlùke. Ki Yèyè awu mumvùlùke bu mùmvwà muMuvùlùke, ne ndi mumanyè ne Yèyè ùdi ne mwoyi ne mMubwayishe mwab’ewu mu cipèèlà emu, ciinà cyà màyi eci.”

51 Kaa, tudi bafwànyine kutèeka aci mu diyishi dyà díbà dímwè mpindyewu mene, dyà ditùkù edi mpindyewu, pàdi cipèèlà cyà maèkèleeziyà, màngumba, ne—ne ba—ba—bayerishi bàà Èvànjeeliyò wa buwetù ne myò—myòdelè yà pa buloba yidi midifindemu, ne micivwije dígumba ne cikòsòlòke.

52 Nènku díbà adi patùdi twela meeji ne nkwiàmè dilòòlò edi kàbìdi, ciinà cyà màyi cyà Ewu udi ne mwoyi ne mummòne. Aci ke cívwa kuvùluka Kilistò ne cyà kùmvwija kùdi mukuukwidi. Èyowà. Kaa, kabàvwa bamùmvwè bimpè to ne bàakamwipata. Yesù wàkamba, pàvwàYe pa buloba apa ne: “Mémè ki Màyi adi ne mwoyi, Mémè ki Màyi à Mwoyi.”

53 Nènku ndi muswè kuzòla makwàbò meeji makesè mwab’ewu àdi mamvwile mu mutù. Díbà dívwà Yesù ku cilumbulwidi, ne kaciyi bwà cingà cintu to kàdi ànu bwà kuseekiibwa, kùdi. . . Wàkuumushiiibwa kwà Pilaatù kutùmiibwa kwà Helòòde. Mpindyewu, Pilaatù kàvwa ne cyà kwenza nàнку to, nènku, nudi bamanyè’s, pàakateetàye bwà kowa byanza byèndè bwà kucyùmusha apu. Kàdi pàkaadici pa byanza byèbè, bùdi naabò mwà kwangata dipàngadika dyèbè. Kwèna mwà kucisàkila kùdi muntu mukwàbò to. Ngwèwè, bu muntu nkààyà. Kàdi Yèyè—Yèyè ùvwa mutùmiiibwe kùdi Helòòdè, ànu bwà—bwà kwenza di—diseka, bwalu bàakamutwà dìnà dyà mwenji wa bishimà ne bikwàbò, ne Ùvwa muntu mudyombola mu èkèleeziyà. Pa nàнку Pilaatù nkààyèndè, wàkadyàmbedila ne bìvwà bikèngela kumutùmaYè kùdi Helòòdè, ne pàmwàpa cívwa mwà kwenza bu cyàjikiji lukunà lwà kale lùvwàbo naalù, muntu ne mukwèndè alu.

54 Nènkù ke pashìishe ke kuyabò ne Yesù mu misèèsù bènda bàpicila nendè mu myaba too ne mùyiidilàYe kafika ku tubàdi tutùmbùke, kwà Helòòdè. Nènkù pàakatutakènáYe ne Helòòdè, ne Helòòdè kupetayè wendè mpùngà! Mmùshindù kaayi ùdi muntu mwà kwikala mukùtākàne's? Bu Helòòdè wikala ànu mumanyè ne uvwa mwimanè kumpàla kwèndè awu ùvwa dyula dyà mupròfetà yònsò wa cyena Ebèlù, uvwa ujingiibwa, nyòtá yà bàà pa buloba, nguvwa mwimàne kumpàla kwèndè awu, dyula dyà byònsò bìvwàbo baakule kùdi beena lungènyi ne bapròfetà abi. Mpùngà wa kwikala musànkishe mwoyi wèndè wà mpèkaatù ne ngàsà ne luse. Yèyè's ùvwa muntu wa lukutukutu wa dikèmà's!

55 Nènkù cidi ànu lukutukutu bu mùdi muntu leelù ewu udibo baleeja cintu cìmwècìmwè eci bwalu tudi bapete bidimu bikwàbò binunu bibìdi byà dilongesha Dyèndè, dyà luse Lwèndè. Kàdi ncintu kaayi—kaayi cyà lukutukutu cyākènza Helòòdè pàvwàye mwimàne kumpàla Kwèndè ne kàyìku mwà kuMulòmba ngàsà ne luse, kàyìkù ulòmba difwidiibwa dyà luse ku mpèkaatù nànsha. Kàvwa mumanyè ne ùvwa mwimàne awu. . . Ncyèna ngèèla meeji ne muntu awu ùvwa mujingùlùle ne uvwa mwimàne kumpàla kwèndè awu ùvwa Muntu wa mùshindù awu nànsha. Tùlekelààyìku aci cìbwela mu ndòndò bwà kasunsa kàmwè. Bwalu muntu awu kàvwa ne dìnà dyà—dyà luumù dyà bipidi bitùmbùke, byà malongolodi mashìilàngàne ne—ne tùnsànkì, ne bikwàbò, bìvwà Yeku muswikàkane naabi to. Kàvwa ne dìnà bu nànkù to.

56 Kàdi Yèyè ùvwa naadi, munkaci mwà bantu bàvwà bamanyè Bible ne bamanyè mulayi awu. Kàdi ngánjì kuumisha ndambù kakesè, aba bàvwà badyànjila kulongolwela Mwoyi wà Cyendèlèlèlè, bàakacijingulula ànu pa dìbà dyàkiimanàYe mwaba awu adi.

57 Kàdi Helòòdè kàvwa yèyè muylè eci to, kacya kàvwa mucìmanyè to. Ncintu cyà dibungama kaayi's wè. Byònsò bìvwà bapròfetà baakule kùkaavwa bidimu binunu binaayi abi, dyula dyà lubilà lwà buloba diimàne kumpàla kwèndè. Kumpàla kwèndè aku kùvwa kwimàne dyula dyònsò. Nènkù ànu mùndi mufwànyine kucyàmba kàbìdi, tuvwa bafwànyine kwela meeji ne ùvwa muntu mukùtākàne bwalu wàkangata dipàngadika dikùtākàne, bwalu, nudi bamòne ne kacya kàtu mulòmbè luse nànsha. WàkaMulòmba bwà—kumwenzela bilèlè. “Kaa, ntu múmvwe bàmba ne Wèwè udi mwe—mwenji wa bishimà.” Wàkalòmba dimucyonkomoja pamutù pàà luse.

58 Aci ke cidi bàà pa buloba, leelù ewu, bàngatulula dipàngadika mene dyà Helòòdè adi, Dìbà didìbo bàmòna Kilistò mwenji wa bishimà awu wènza byà mwomùmwè leelù ewu byàkenzaYe cikondo aci, kàdi cintu cìdìbo bòbò bàlòmba cidi ànu ne: “Nkùmonàku wenza *cikampànda*.” Udi wamba ne Helòòdè neapètè mwaba mubi wà kwimanyina anyi? Muntu

wa ditùkù edì neikalè yéyè ne mwaba mutàmbe bubì wà kwimanyina! Helòòdè ùvwa ne bidimu binunu binaayi byà dilabula, baprófeta ne beena meeji. Twètù tudi ne binunu bisambòmbò, ne dilongesha ditàmbe àvwàbo naawù cikondo aci. Cyà bushùwà. Ncintu kaayi cyàkenzàci! Ki mùdibi kàbìdi leelù ewu, cintu cimwècimwè aci!

⁵⁹ Bwalu bùvwa bìshi? Helòòdè kàakacyèlela meeji à dísu dikolè nànsha. Kààkiimanakù bwà kwela meeji nànsha.

⁶⁰ Nènku mùshindù awu ngùdì bantu bàà leelù ewu. Bàdi bàmona cintu cyà cinène eci, cìdi cibàkèmesha, kàdi kabèèna biimana ntàntà mukumbàne to. Bàdi bàteeta kutèeleja laabi kampànda anyì mwena tèlòlòji udi uumvwija mùdìCi kaciyi ne mushinga. Kàdi pààbì, mùndì ngèèla meeji bwà Jeffersonville: “Mmisangu bùngì kaayi yìntù muswè kunùbwikila bu mùtù nzòòlo wa cikuka mwà kubwikila twànà twèndè, kàdi kanwènà baswè to. Mmisangu bùngì kaayi yìntù mujinge bwà kunùkungwija? Mmisangu bùngì kaayi yìmvwà mufwànyine kuvwija eci ka—katùpà kàà budimi mùvwà ndèkà mwa kutwàla bàà mu matùnga ònsò, kàdi kanwènà baswè to.” Nwamònu anyì? Nwamònu anyì?

⁶¹ Mpindyewu, nudi bamòne cìikalà Helòòdè ne cyà kuvùluka ditùkù adi anyì? Mpùngà wèndè munène awu, wàkamudyombola. Nènku dyàmwàmwa mwaba kampànda mu myaba yà bajimine, dilòlòlò edì, ùdi munkaci mwà kuvùluka cyàkenzàye bwà bwalu abu. Dìbà dikaadi dimana kupita mpindyewu.

⁶² Kanùlekedì aci citwenzekela twètù to. Eci ncyètù cikondo cyà busàmbi. Tùvùlukàayi Kilistò, ne Yéyè ùdi umweumwe awu makèèlèlè, leelù, too ne kashidi, Ebèlù 13.8. Kanwindidi too ne mu bipaapu kampànda byà dyàmwàmwà, mu bapìshishibwe, mu cipaapu aci munùdì kanùyì mwà kuya mu Bwikadi bwà Nzambì nànsha, ne dìbà dyènù dimanè kujika pa buloba, mu bilòòtálòòtà byà bwòwà nenùvùlukè ne nuvwa bapetè wenù mpùngà kàdi nwakamudyombola. Bansongà bàtabaleelè eci. Bònsò bàcìtabàlèlèlè.

⁶³ Helòòdè kàakatùmaku meeji à nsongo nànsha. Wèndè mpùngà umwèpelè, wàkalòmba ànu bwà kucyonkomojiibwayè, bwà ne Yesù wènzakù kaadiyelè kampànda, bwà kulòpola kàlulù mu cifulu, anyì, nudi bamanyè’s, anyì cintu kampànda. Kwelayì meeji ne Ùvwa mufwànyine kwikala nànku, mu mùshindù kampànda, wàkaMumòna bu mwena màjìmbu. “Tuvwa bùmvwè ne Wèwè udi mwà kwenza màjìmbu. Ndeejàku dìjìmbù Dyèbè adi mpindyewu.”

⁶⁴ Nènku swàyi ngambè eci ne kaneemu kààbùngì. Kàdi mmisangu bùngì munyi yidì bàdi bàdyàmba mùdìbo bayiishi bàà ditùkù edì, bàmbè ne: “Kwòkò kwikale Nyumà Mwimpè, pawikalà witabuuja ne Nyumà Mwimpè udi ànu mwàkadiye ku

cibangidilu amu, tùmònèbi mûdi wangata mununu *Kampànda* mwab'ewu, anyi *kansanga*, kaa, muntu mulùme ewu, muntu mukàji ewu. Nènkabàngàte. Tùmònèbi mûdi ucyènza.”

⁶⁵ Mbajingùlùlekù ne aci nyumà umweumwe awu anyi (to, kî mbajingùlùle to) wàkambila Yesù ne: “Ní Udi Mwànà wa Nzambì, angàtà, andàmùnà mabwe aa mampà. Ní Udi Mwànà wa Nzambì twambilaaku udi muKutuute cintu mu mutù awu. Ní Udi mupròfeta, twambilaaku udi muKutuute cintu awu,” ne mukùsù muswika kwìsù Kwèndè. BaMutuuta cintu mu mutù, ne pashiishe bàsambulujilangana mucì ewu ne ewu, bàmba ne: “Twambilaaku tûng, ní Udi Mupròfeta. Twambilaaku wàKutùcì, díbà adi netùKwitàbùùje. Twambilaaku, ní Udi Mwànà wa Nzambì. Tudi ne meeji matòòke mu myoyi yetù. Ní Udi Mwànà wa Nzambì, tүүлukàaku ku nkùrusè nènku netwìtabuujè ne Wèwè udi Mwànà wa Nzambì.”

⁶⁶ Ndi ndikonka ne bantu bààbùngì leelù ewu, ne balùme, ne bakàji, bansongà ne banunu ní kabèèna mu kaaba kàmwèkàmwè aku. Nènku nenùvùlukè, dîngà ditùkù, ne nwènù nuvwa mu Bwikadi Bwèndè, ku Mpokolo Wèndè; ne baswè kumòna dijimbù, anyi baswè kumòna diyelè kampànda, anyi cintu kampànda cikwàbò ne: “Aci ki cyàCingiitabuujijà. Nguumvwèku divwayila kampànda paanyimà pàanyì apa, ne ndekèlaayi ngènzè *cikampànda* anyi *cikansanga*, nènCiitàbùùjè.” Nwamònu's, disaluka kampànda, nditèndeleelela dyà mpìngù dyètù dyà patòòke edi! Ndekèlaayi. . .

⁶⁷ Nudi bamanyè's, Yesù wàkamba mu cilumbù kampànda, Wàkela lukonko. Ndi muswè kukonka èkèleeziyà dilòòò edi. Yesù wàkamba ne: “Bwà cinyi? Bwà cinyi? Bwà cinyi nudi nuMbìikila ‘Mukalenga’ wenù, kàdi kanùyì nwenza bintu bîNdi nnutùmìna díyì bwà kwenza? Bwà cinyi nudi nuMbìikila ‘Mukalenge,’ kàdi kanùyì nulama Díyì Dyànyì? Bwà cinyi nudi mwà kuMbìikila ‘Mukalenge,’ kàdi nuvila bintu bîNdi munùtùmìne díyì bwà kuyiisha ne kulongesha?” Ncinyi aci? Cidi cyènza cinyi? Mbwalu cilèlè kampànda cyà cyena màngumba nciimàne pankaci pààbò ne Díyì. Nènku cintu kanà cyònsò cidi ciimàna pankaci pèènù ne Nzambì aci, ndupìngù, cidi cyàngata kaaba kàà Nzambì. Bwà cinyi nudi nubìikila ne: “Mukalenge”? *Mukalenge* mbwena kwamba ne “bwena cintu,” Mukalenge ùdi ne cintu cyèndè. Nènku Nzambì Yéyè naanyi, mèmè mwikalè Wèndè, ne Wàkanguumusha dîngà ditùkù pàmvwà mu njila mubì, ne kumbìikila bwà kiipàcilà kampànda, cindì ne cyà kwenza ncinyi piikalàci kaciyi dyuja dyà dijinga Dyèndè, ànu mwàkenzelàYe Pòlò amu. Mmunyi mùndì mwà kwenza cîngà cintu kutàmba kulama Díyì Dyèndè? “Mbwa cinyi nudi nuMbìikila ne ‘Mukalenge’?”

⁶⁸ Ndi muswè kutèèla muntu mukwàbò mwaba ewu, kumòna maalu àdì àmutàngila. Twambè bìshi bwà Yudaàsà, cìvwàye ne cyà kuMuvùlùkila ncinyi? Tudi twakula bwà kuvùluka

Mukalenge. Yudaàsà dilòòlò edi ne, kaa, too ne pikalaye kàciyikù kàbìdì, neikalè ne cyà kuvùluka ne wàkasùmbisha makenji ènde à bwanàbutè. Wàkasùmbisha Yesù bwà makàsà èndè sungasunga. Tudi tudyùla Yudaàsà. Tudi twamba ne ùvwa nsongàalùme wa bukooyà, mubì, kí mmukùmbànyine mwaba nànsha ùmwè anyi musùmbà nànsha ùmwè to, kí mmukùmbànyine Dyulu to. Bwà cinyi? Yèyè wàkasùmbisha Mukalenge wendè, paanyimà pàà yèyè mumanè kupeta mpùngà wa kwikala mu—muyiidi, bwà kwikala mùpostòlò, dibìlkidiibwa ditàmbe kutùmbuka mu Bible, ditùmbùke kutàmba mupròfetà. Yèyè ùvwa ne mpùngà wa kwikala mù—mùpostòlò, kàdi kusùmbishayè bukenji abu bwà makàsà èndè sungasunga. Nènku mpindyewu ùdi ne cyà kuvùluka cyòci aci. Ke mùshindù ùdiye ùvùluka Yesù: makàsà à sungasunga.

⁶⁹ Nènku ndi ndikonka ne mbanganyi bàà kùdìbo dilòòlò edi pààbù biimàne mu cyambilu, pààbù bavwàle mùzàbì wà kòralè, basòmbe mu nkwasà wa mulami, anyi bangàta kaaba kàà mulami wa cibucilu, mulubuludi, anyi cyònsò cidì mwà kwikalakù aci, kaaba kèndè mu èkèleeziyà, anyi mwambi ku cyambilu, cikòlà munkaci mwà kusùmbisha mpùngà wendè bwà butùmbì bwèndè sungasunga ne: “Docteur, Mwèpiskòpò *Kampànda*,” bwà butùmbì bwèndè sungasunga, dipeta dyèndè sungasunga.

⁷⁰ Muntu kampànda kungambilayè musangu kampànda ne: “Ndi ngiitabuujà ne aci m’Bulelèlè. Kàdi bu mèmè muciyiishe, ndi mufwànyine kwikala ngènda nndòmbangana kàà pa luse mu mùsèèsù.”

⁷¹ Nudi bavùlùke muntu mubanji ne Lazàrò, cìvwa ndekeelu wabò ne mwaba wabò wà Cyendèlèlè ùsanganyibwa anyi? Nànsha mùvwà ewu mwikàle ne...mwikàle mulòmbi wa kàà pa luse, ne mukwàbò mwikalè muntu mubanji amu, kàdi ngònyònyì yàkandamuna myadi dìngà ditùkù ne bùbìdì bwàbò bàvwa mwà kuvùluka. Pa nànku, bantu bàdi bàbingila Yudaàsà wakaMusùmbisha bwà dipeta dyèndè sungasunga, nènku bààbùngì menemene bàdi bènza cintu cìmwècìmwè eci leelù ewu, bàMusùmbisha bwà dipeta dyàbò sungasunga.

⁷² Baakwidi bàà matùkù awu nebavùlùkè pààbò ne bààkasùmbisha dyèsè dyàbò bwèndè Yèyè, dyèsè dyàbò dyà kulwàbò basadidi Bèndè, bwà kulwa bayiidi Bèndè, bwà kulwa bakùdimune mucimà kùdiYe. Bààkacisùmbisha bwà mukàwù wà lulengu. Bàvwa ne mukàwù bwà Dilongesha Dyèndè. Mòna’s, pàcìvwaYe ànu ne bidimu dikùmi ne bìbìdì, Ùvwa mwà kubàpita mu mùshindù kanà wònsò; kàdi kabàyi bàcìjingulula to, ne yèyè ùvwa m’Maasiyà awu. Kabàvwa mwà kwenza bintu byàkenzàYe abi to. Nènku bàvwa ne bwôwà bwà ne nkwèpì kwalwàbo kujimija luumù lwàbò kumpàla kwà bantu aba bàà cipidì citàmbe kutùmbùka aba, ne kupàanyishabò mpùngà wabò. Nènku mbapile ànu mùvwà Helòodè amu.

⁷³ Nènku cidimba cyà èkèleeziyà wa leelù cidi mùshindù ùmwèùm wè awu. Pìikalàbo bàkeeyemene màngumba àbò ne bikwàbò, mu matùkù awu, ne bìikàle bàcìina bwà luumù lwàbò—lwàbò, bàvwa mwà kubìipata mu nsunàngòngà, cìvwa cinyi díbà adi? Cìvwa ditèndeleele dya mpìngù! Bàkuukwila lupìngù lwà twìtabààyi anyi lupìngù lwà ntèndeleeelù wa èkèleeziyà, pamutù pàà kwitaba Dìyì didi ne mwoyi dìvwà dimwènèshìibwe kumpàla kwàbò.

⁷⁴ Nènku bààkamòna Dìyì dya Nzambì. Bible mmwàmbe ne: “Twètù tudi baMumòne ne baMulenge ne byanza.” Bantu bààkatenteka byanza pa Dìyì dyena diina, dya mwoyi, dimwènèshìibwe dya Nzambì udi ne mwoyi; ne kulekela bilèlè ne twìtabààyi biimàne pankacì pààbò, kusukula kwa nzàbà ne ngeesu, cintu cyà manyaanu nàнку cìimane pankacì pààbò ne Nzambì udi ne mwoyi. Eyowà.

⁷⁵ Cìvwa cinyi aci? Bàvwa ne lukìnu. Bàvwa banyooka Wendè Èvànjeeliyò wa mu Mifùndù mukezùke, wa kazeze uvwaYè ùlongesha awu, Dìyì dya Taatù. Bàvwa baMumvwile mukàwù. Bàvwa baMukina. Nènku ntàntà yònsò wìkalabò ne civùlukilu, ciinè aci, nànsha mu ifèrnò nebàvùluke, ke mùshindù wàbàvùlukàbo. Ke mùshindù wìkalàbo ne cyàkuMuvùluka.

Wèwè udi wamba ne: “Kaa, abu bàvwa Bàfaalèsà.”

⁷⁶ Kùdi inàbànza mutekète uvwa ne ciibidilu cyà kulwa mu èkèleeziyà ewu. Kaa, ndi ncinka ne bààbùngì bàà kunùdi mbamumanyè, mmusòmbèle kwinshi kwà mùsèèsù ewu ntàntà. Úvwa mutwè cìmpìngà. Ne musangu wònsò ùndi mmumòna, ùdi ùnyeemena kùndi, utèeka byanza byèndè mu byànyi mèmè ne: “Mwanèètù Bill, nsambidìlèku. Mèmè ndi mutwè cìmpìngà.” Bàyèndè ùdi. . . To, ngèèla meeji ne mbasòmbèle kumutù kwà mùsèèsù ewu. Nkàadi mumumòne mu Nyumà, mumòne Nyumà wa Nzambì pambidi pèndè, ne yèyè ùja maja, ùsànka, ne bikwàbò. Kàdi ùvwa mutwè cìmpìngà. Nènku ùvwa mulààle mu lùpitaadi matùkù mashààle aa kuntu kwàka, ùpunga ne lufù, mukwàbo bèèla meeji's. Ki kuntùmìnayè mukenji bwà mèmè kumamusambidila.

⁷⁷ Yèyè ne bàyèndè bàvwa bantu bìmpè bikolè kùdi mukàjàanyi, pàvwà mukàjàanyi, nsongàakàji mutekète, muvwàle mikùsu, wa kwìsù manyaanù, bàvwa mwà kumusumbila kaankanzu kakesè anyi cintu kampànda cyà mùshindù awu, bwà kumwambulwisha bwà kuyayè mu kàlaasà. Nànsha ciikàle cikesè cyà bishi, kwènà mwà kwenza kantu nànsha kàmwè bwà Nzambì Yèyè kupanga kukàvùluka nànsha. “Byònsò binùdi benzèle batàmba bukesè bàà ku bàna Bàanyi bakesè aba, nudi bangenzèle Mèmè.” Nènku bu dyàmpà dyela pa màyi, nedyàlukilè.

⁷⁸ Ki mukàji mukesè, mukwàte ne byà luse, mutwè cìmpìngà awu mulààle mwaba awu, ùdila mwadi, munkwàte ku cyaanza.

Ki yêyè . . . Mêmè kwamba ne: “Èè, mwanèètù wa bakàjì, nèn—nènkwenzèlè disambila.”

⁷⁹ Kàdi ku bulààlù bùvwà lusekè lwèndè aku kùvwà kulààle mukàjì kampànda muvunge mabòkò, muntàngile. Ne mwanèndè wa balùme mutekète musòmbe ku luseke kwèndè, wa bidimu bitwè ku makumi àbìdì, ùmwèka Ricky wa cyena leelù.

⁸⁰ Nàнку, ncyèná mpeetula muntu kampànda udi dínà dyèndè difwàne kwikala Ricky to, kàdi ndi nswa kwamba ne cidi . . . kacya kanùtukù búmvwè dínà dyà mùshindù awu matùkù à kale to. Elvis ne Ricky, ne cidi ànu dínà dyà cikondo, nudi numòna’s. Wèwè ne mwànà ne dínà adi, mubiikile mu dínà diibìdì, nàнку, anyi mupèèshè dikwàbò.

⁸¹ Nàнку pàvwàye musòmbe mùshindù awu mwaba awu, e kuntàngilayè, ki mêmè kutwàdija kwinyika mutù wànyì, ki mêmè kumumòna ùmweka menemene . . . Yèyè ne: “Indila kakesè! Kòkaayi cilàmbà cikùdika aci!”

⁸² Mêmè kwamba ne: “Mvwa nkeba ànu kusambidila inàbànzà ewu. Wèwè kwena—kwena—mwena kwitabuuja anyi?”

⁸³ Yèyè ne: “Nènkwambilè mpindyewu ne, twètù tudi ba-Méthodistes, ne tudi baswè bwà wèwè kukòka cilàmbà cikùdika aci!”

“Èyo, maamù,” ki mêmè kukòka cilàmbà cikùdika.

⁸⁴ Nwamònu’s, cintu cimwècimwè aci. Cintu cimwècimwè aci leelù ewu, lukinu lwà dikèma! Mmunyi mùvwàye mumanyè ne mêmè mvwa muyiishi wa mùshindù kaayi? Kacya ncíwva mwanji kumòna mukàjì awu. Kàdi pàmwàpa ùvwà muumvwe muntu kampànda wàmba ne mêmè mvwa ngìtabuuja dyondopiibwa dyà babèèdì, ne yèyè ùvwà mulongeshiibwe bibèngangane ne cyòci aci. Kàvwà naaci bwalu to, yèyè wàkacydyombola. Ùvwà ne bwòwà bwà ne cíwva mwà kumuponena. Lekà kutàta, kacya kucukuponena to, ànu mùvwà Pilaatù kàyì mwà kucyùmusha pa byanza byèndè amu.

⁸⁵ Mpindyewu, aci ki nkwamba ní ncinyì ní ncinyì bwà kufwisha ba-Méthodistes bundù to; awu ùvwà ànu mukàjì umwèpelè. [Katùpà kàà mukàbà wà mèyi munda mutupù—Muf.] Nwamònu anyi? Ncifwànyine kwikala ànu lwèndè lwidì. Ncyena ngèèla meeji ne ba-Méthodistes bònsò mbafwànyine kwikala nàнку to, bwalu nkàadiku musambidile bààbùngì bàà kùdibo. Bàtu bàmbiikila bwà kubàsambidila, ne bimanyinu ne maalu à kukèma mbyenjilbwe munkaci mwàbò. Kì mbantu bàdì mu maèkèleeziyà amu to; ndongolwelu udi ubàkòkèsha, ke udi ucyènzà. Kàdi yèyè mukàjì awu ùvwà wa bàà nàнку awu abu. Cívwa ncinyì aci? Mufindè kwisù ne mukàwù wà lulengu, wà diabùlù.

⁸⁶ Mvwa mwà kwamba cintu kampànda. Mu—mu disangisha kampànda òvwà mu cimenga emu musangu kampànda, nènku

kukonkabò ne bwà cinyi kabàvwa bambiikile mu dyòdi amu. Kàdi ndi nkekela ciine aci bwalu ndi kumbèlu. Kàdi, ne mu mishindù yònsò, kakùyì kabingilà to, cidi ànu mukàwu pàtupù, ntwitabààyi, nditèndeleele dyà mpingù. Mùshindù mwinè utùdi mwà kujinga bwà kwelangana mabòkò ne muntu yònsò, kàdi panùdi badyombòdìbwe. . . Yesù wàkaswa kucyènza. Vùlukààyi ne, dingingà ditùkù ne bikèngele nùvùlukè aci. Bikèngela nùcivùlukè.

⁸⁷ Cidi ànu cìmvùlwija bujaadiki kampànda bwàkafdiibwà matùkù mashààle aa. Mwambi kampànda, mwinè awu ùvwa pa cibàndilu wènda ùya muulu, ku Nzùbu wa Heyburn eku. Nènku kùvwa bantu bàsàtù biimàne ne mwambi ewu mu—mu cibàndilu amu, ne bòbò—bòbò kabàvwa bamanyè ne muntu ewu ùvwa mwambi to, ngèela meeji ne kabàvwa bamanyè to. Kàdi mu dibànda dyàbò adi, e kwimanyinabò bònsò mu cisàsà cyà mwandamukùlù. Ki muntu umwe kutàngilayè kùdi mwambi awu, e kwambayè ne: “Udi mumanyè anyi? Eci cidi ànu bu ne ki pèètù pabwìpi patùdikù mwà kuseemena ne mu Dyulu apa’s.”

⁸⁸ “Èè,” mwambi awu kwambayè ne: “Ndi—ndi ncinka ne udi mubingè. Ndi—ndi ngèela meeji ne udi mubingè, bwalu patùdi ànu tweyemena dikumbànyina dyètù twètù biine, eci cidi pèètù pabwìpi patùdikù mwà kufika.” Ncyà bushùwà. Paucidi ànu weyemena mu byùdi wenza, udi uvùluka byùdi mwenze. Nènku ndi mutwìshìibwe ne bààbùngì bàà kutùdi katwèna ne citùdi benze to, katwèna bakumbànyine cintu nànsha cìmwè to. Kwambayè ne: “Ndi ncinka ne twètù munkaci mwà kweyemena dikumbànyina dyètù twètù biinè, eci ki wètù mwaba utùdi pèètù mwà kushiikidila ewu.” Èè, patwìkalà ne dyeyemena, ki wètù mwaba utwàshìikidila awu.

⁸⁹ Kàdi, kaa, ndi muswè kwamba cintu kampànda. Ní ndikù mwà kupwà mwoyi cìmvwà, kàdi kuvùluka cidiYe, bu mèmè mwà kuvùluka Yesù, bu mèmè mwà kuMuvùluka ku nkùrusè, bu mèmè mwà kuvùluka cidiYe mwenze bwànyì mèmè, nènku ndi mwà kuvùluka dìbà dyàkuumushayè mpèkaatù yànyì, ne kumpèèsha Nyumà Mwìmpè bwà kundombola, dìbà adi mèmè e kwambwibwa kumutù kwà bintu byònsò bìdi bikwàte buloba ebu. Ndi mubàndìshìibwe kumutù kwà cintu cyònsò cyà pa buloba, mu myaba yà mu Dyulu mu Kilistò Yesù, mùndi mwà kubwela Nèndè mu bwobùmwè. Mu Bwìkadi Bwèndè amu, mpwa mwoyi cìmvwa kwònsò eku, mpwa mwoyi mpèkaatù yànyì yònsò ne bikwàbò byònsò, bwalu bìdi mu Mbù wa Cipwàmwòyi. Mpwa mwoyi matùkù ànyì mashààle awu, mpwa mwoyi bintu byònsò, ne mvùluka ne Wàkangenza Wèndè Yèyè, ku lufù Lwèndè Sungasunga. Wàkangata kaaba kàànyì. Kàdi mèmè uvwa ncìyi ne bukenji bwà kuya ní mpenyi to ànu mu ifèrnò awu, Yèyè wàkangata kaaba kàànyì e kumpàtulayè mu ifèrnò. Wàkayamù bwà bwalu bwànyì. Ne Wàkambàdisha ku ngàsà Wèndè wàbùngì, mu mùshindù wà ne mpìndyewu tudì bàna bàà

balùme ne bàà bakàji bàà Nzambi, ne tudi tusòmba mu myaba yà mu Dyulu mu Kilistò Yesù, tusànka ànu kusànka ne tuvùluka Yèyè Wakatùkùba bìmpè too apa. Nènku biikalè ne diitabuuja dyà ditùtuka munda mwà misùùkà yètù, ditùcincimika, ne ku ngàsà Yèyè neàtungunuke naanyi.

⁹⁰ Nènku ku mèsù à diitabuuja ndi mmòna Mufùndù Wèndè mûle ne: “Bònsò bààkadyànjlàYe kumanya, Wàkabàbìikila; bònsò bààkabikilàYe, Wàkabàbingisha; ne bònsò bààkabingishàYe, Wàkabàtùmbisha.” Ki bwà cinyi ne eci mu meeji, ndi mwimàne mu disangisha dyà bantu, mùdi Nyumà wa Nzambi ùsanganyiibwa, ne batùntùmùnyiiibwe mu myaba yà mu Dyulu mu Kilistò Yesù. Bindile dîbà dîikalà cifwanyi eci cibi cyà mwoyi wà buntu ewu ùdi ne dituuta dyà mwoyi dyà cifwàkà edi, ne didi ne cyà kwimana dînga ditùkù, pîikalàci cishintùlùdiibwe ne cipèèbwe mwoyi wà Nyumà wikalà mwà kutuuta mu cikondo cyònsò cidi kacyi mpwilù kupita aci, kawùyì màsaamà, kawùyì cinyongopeelu, kawùyì bukùlakàji anyi ní ncinyi cyònsò to.

⁹¹ Vùlukàayi Yesù. Pàdi nyingù ùshààlà munda mutùpù ku nzùbu, ne kamùciyi kàbìdi bukula, vùlukàayi Yesù. Pàdi ngàngàbukà wàmba ne kakwènakù mùshindù kàbìdi to, vùlukàayi Yesù. Pàdi dyabùlu ùkutèya; mutùtù twimba musambu wètù wa ditangalajangana naawù apa: “dîbà didi matèyi àtùjingila, nungànà Dîná dyà Cijila adi mu disambila.”

⁹² Kuvùluka Yesù, kuvùluka ne Yèyè neàlwe cyàkàbìdi. Yesù umweumwe wakuumushiibwa kutùdi awu neàlukile mu mùshindù ùmwèumwè utùvwà baMumòne ùya mu Dyulu awu. Vùlukàayi ne, Yèyè neàpinganè bwà aba bàdi Bèndè Sungasunga.

⁹³ Tùsambilàayi. Nènku ne mitù yètù miinyika, nènku ne Diyisha edi dikesè dikòsòlòke diciikàle mu mwoyi wènù, nudikù baswè bwà Yèyè kunùvùluka mpindyewu anyi? Bu nwènu mwà kuswà, elàayi ànu byanza muulu cyanàànà, ne cintu kampàndà cyà pabwàci cyà ne: “Mukalenge, wamvùlukakù.” Ànu mwàkamba mwedi wa kasàlà ne: “Wamvùlukakù pîikalà binsònji munkaci mwà kumata.”

⁹⁴ Taatù Wetù Mutàmbe Cijila, tudi basànke bikolè bwà Bwikadi bwà Nyumà Mwímpè, bu mùdiYe mutùleeje Dîyi dyà Mwoyi, bu mutùdi tuvùluka ciina citwàkapatudiibwàmu ne twàkuumushiibwa mu ciina aci ne bafwìmbiibwe bàna bàà Nzambi, ku ngàsà wa Yesù Kilistò. Mémè kuMuvùluka, pàakantàngila ngàngàbukà mu mpàla e kwambayè ne: “Kùdi ànu tusunsa tukesè cyanàànà kàbìdi,” mémè kuvùluka Yesù. Mémè kuvùluka Yesù, pàmvwà ku cyoshelu ndila ndòmba luse ne pàakatùdiibwa bujitu pa musùùkà wànyì, Ndi mvùluka bujitu bwàkanguumuka. Yesù wàkambula bujitu bwànyì. Kùkaadi ngondo mikesè, mémè musòmba pa cibàsa, ntàngila mu lumwènù

lwà cigoma, bwà kwasa cîmwà ndudikila, ne Sâtaanà ùvwa ne cyà kwikala mwele meeji ne: “Ewu ki wanyî mpungà mpindyewu.” Kàdi pààkataayikà cingoma, lubungu ne ntàku wa cingoma ne ndëndè kutaayikabì, ne mudilu kungiicikilawù pambidi pwònsò, ki mèmè kuteeta bwà kujuukila kuulu, ki mashi awu àfùkuka fùkùfùkù, ndi mvùluka ne ùvwa n’Yesù. Dìbà òvwa ngàngàbukà, pààkatàngilàye ne kumòna ne kabìvwa bingenzèle bibì to, kwambaye ne: “Cintu cimwèpelè cîndi mumanyè, ncyà ne Mukalenge ùvwa ne cyà kwikala musòmbe mwaba awu, pèndè, munkaci mwà kukùba musadidi Wendè, ùvwa mufwànyine kwikala musùnsùlùdiibwe kùdi ditaayika dyà mùshindù awu.” Éyì Nzambì, mùshindù mwinè wutùdi bwònsò tuvùluka bintu abi’s wè!

⁹⁵ Tudi tulwa ku Mpokolo mùle tètè ne Mashi, makòka mu mijilu yà Emanùwèlè. Tùbènèshèku, Mukalenge, pàmwè dilòdò edi. Wèwè udi mumanyè kii—kiipàcila ne cidì cìsàka mwoyi wònsò ùdi mwele cyanza kuulu ewu. Wèwè udi mumanyè dijinga ne dikèngela. Nènku bu musadidi Webè, Mukalenge, ndi—ndi ndwa naabò, ne—ne tudi tuumuka mu tabernacle ewu mpindyewu, ku diitabuujà, tuya, dyàmwàmwà dyà matutu ne ngondo, ne mìtootò ne Njila Mutòoke wa Muulu, nènku mpindyewu tudi tufika mu Bwikadi bwà Nzambì. Nènku cyoshelu cyà ngòlò ncyèci cyadijya kumpàla kwànyì eku, pòpò apu mpatèeka Mulàmbù ùtùdi tuvùluka, Yesù, wakamba ne: “Lòmbaayi Taatù cyònsò cinùdi baswè mu Dìnà Dyànyì, Mèmè—Mèmè nennwenzèlèci.” Enzà ne diitabuujà dyètù kadìpangidiku to, Mukalenge, kàdi tuvùlukèku ne tudi tupeta citùdi tulòmba, twètù baciitabùuje, bu mutùdi bavùlùke ne Yesù wàkafwà bwà kucikùba bwètù ne kucishindika.

⁹⁶ Mukalenge, tudi tumòna ne Wèwè udi munkaci mwà kudyundisha nzùbu wetù. Ng’Wèwè udi mutwenzèleci, udi mutùpe dyalabala dyà èkèleeziyà. Ne tudi bamanyè ne ùvwa ng’Wèwè, Mukalenge, Wàkatùpèèsha èkèleeziyà ku cibangidilu awu. Tudi tulòmba bwà wàmònakù mwà kubènesha didyènzeja edi.

⁹⁷ Mukalenge, tudi tulòmba bwà mpaasàta wetù, Mwanèètù Neville, musadidi Webè wa didipwekesha ne wa ngàsà, wa lulamatu. Mmuswè kukukwàcila mudimu pa kaaba kwònsò, nànsha bàmba ne nkwikala musòmbe mu nkwasà paanyimà pààpa anyì ne mbwà kukòmba mu èkèleeziyà. Mwaba kanà wònsò Ùdi nendè dijinga awu, mmuswè kwikala mwaba awu bu cyamù cyà mudimu, bwà kukusadila Wèwè mwaba kanà wònsò Ùdi umubiikila. Tudi tulòmba, Nzambì, bwà—bwà Wèwè kumubènesha.

⁹⁸ Nzambì, cilumbulwidi eci cinène cîndi mfùma ku dipìcila, ne balubuludi aba bàvwà biimanè ku luseke kwànyì, ne èkèleeziyà ewu uvwa—uvwa munsambidile, ne ndekeelu wa byònsò bucimunyi kulwabò. Éyì Nzambì, ndi mbàsambidila. Ndi

mbàvùluka, pààbò, Mukalenge, ne ndi mutwishiibwe ne Wèwè pèèbè udi ubàvùluka.

⁹⁹ Tudi tuvùluka Mùdì dibènesha kutùdì. Ne tudi bavùlùke Diyì Dyèbè, bwà ne Wèwè kwàdyàkutùshiyakù anyi kwàdyàkutùlekelakù nànsha. Bununu kabwàkwenzaku bwalu to, Wèwè newikalè ànu utùvùluka, pìikalà buloba kabùciyikù kàbidì to ne pìikalà cikondo mwà kutùkina mu Cyendèlèlè. Mbafunde cintu kampànda cyà mùshindù ewu ne: “Maamù ùdiku mwà kupwa mwoyi mwanèndè udiyè wàmusha anyi? Mémè ncyéna mwà kunùpwa mwoyi to. Nudi bapoopela munda mwà byanza Byanyi,” misonso ke yàkapoopela mènà ètù. Tudi bamanyè ne Wèwè udi mutùvùlùke, Mukalenge.

¹⁰⁰ Nènku swàkù bwà Wèwè kwikala misangu yònsò ànu mu bivùlukilu byètù bitùdì batàmbe kunanga, bu Musùngidi wetù, Mwondapi wetù, Mfùmù wetù, wetù Mutùnangi, Mwoyi wètù, Muunya wètù, byètù Byònsò mu Byònsò, mushimì ùdì kawùyì ùkàma wà ngàsà ne dinanga dyà Nzambi kutùdì twètù bantu bakùlùke bàà mu dikù dyà Adàmà. Enzàku nànkù, Mukalenge, patùdì tudilàmbula twètù biinè Kùdì mpindyewu apa, tuumuka mu tabernacle dilòlò edì, munkacì mwà kuvùluka Yesù. Amen.

¹⁰¹ Nudi baMuvùlùke anyi? Nudi baMunangè anyi? [Disangisha didi dyàmbe ne: “Amen.”—Muf.] Mpindyewu ndi ngèela meeji ne, mu Diyishi dyètù dikesè dikòsòloke, tudi bafwànyine kwamba nùnkù. Pòlò mmwàmbe ne: “Cyònsò citùdì twenza aci, tudi twenza mu Nyumà.” Mu bintu byònsò bìvwa bikèngela twètù kuMuvùluka. Katwàngacikù dipàngadika katùyì bànji kuMuvùluka to; katwènjiku cintu nànsha cimwè to, bwalu neciikalè cintu cyà cibì be. Mulwishì yèyè mutuute dipì ku luseke lwà ditàma, tùvùlukaàayi cyàkenzaYe kumpàla kwà twètù kumwalujila. Tùvùlukaàayi cuyenzedi Cyendè. Kwòkò dipàngadika dyà kwangata, twindilàayi, tùvùlukaàayi ne ndipàngadika dyà mùshindù kaayi ditùdì twela meeji ne ke divwàYe mufwànyine kwangata, pashiishe adi diikalè dyètù dipàngadika. Twètù balwijàkàje, tùvùlukaàayi ne Yèyè kacya kàtukù mulwijàkàjee. Nwamònu anyi? Myanda yòyi mitàmbe kutùlubakaja, nwavùlukaayi ne Yèyè mmusòmbèle mu Cyendèlèlè, bùngi bwà dibà kabwèna buMwenzela bwalu nànsha. Mbilààle ku cidì cikusaka ne kiipàcilà kàà mwoyi wèbè. TùMuvùlukaayi.

¹⁰² Nènku tùMuvùlukaàayi mpindyewu patùdì twimba musambu ewu mu Nyumà wa Bwikadi Bwèndè apa ne: *Ndi MuMunangè*. Wèwè musòmbèle mu dinanga, udi musòmbèle mu Nzambi, bwalu Nzambi ùdì dinanga. Aba bàdì basòmbèle mu Nzambi mbasòmbèle mu dinanga. Nwamònu anyi? Nènku dinanga kadìtu ne lukìnu to. Dinanga kadìtu ne mukàwu to. Dinanga kadìtu ne madyùja to. Dinanga kadìtu diditwàla bibi to. Dinanga dìtu misangu yònsò ne kalolo, dipòle, difwilangana luse, ne musàngelù. Nànsha bàmba ne bakwàbò bàdì ne bululu bwà

bishi, dinanga didi dishààla ànu mwàdi nì kale. Dinanga ke nkàmisha wa ngàsà. Dinanga ke nkàmisha wa Nzambi bwètù. Paanyimà pàà mapà makwàbò ônsò ne bikwàbò bimanè kujìmina, bipròfetà byètù, myakulu yètù, dyandamuna dyètù, byònsò bitùkaadiku kacya bènze, anyì ní mbinganyì bikwàbò, pàdi dinanga dibwela, ke nkàmisha awu. Didi kumutù kwà byònsò, bwalu bikwàbò byònsò bìdi bìpangila. Dyòdi ke—dyòdi ke dipàngadika dyà Tubàdi Tukùlumpè. Ndikunji dyà ciswikidi. Mmùtootò wà ku Nord ùdi ùlamina bendi bàà pa mbù mu njila. Nkaleeja Nord kàdi kàtùlombola. Dinanga ke nkàmisha. Tùcivùlukàayi patùdi twimba apa ne: “Ndi muMunangè.”

Ndi muMunangè, ndi muMunangè
Bwalu Yèyè wàkannanga kumpàla
Ne wàkampetela lupàndu
Ku mucì wa Kàlvariyo.

Ndi muMunangè, ndi muMunangè
Bwalu Yèyè kumpàla . . .

Mpindyewu vùlukàayi ne: “Yèyè wàkannanga, ne wàkafilà Mwan’Èndè.”

Ne wàkampetela lupàndu
Ku mucì wa Kàlvariyo.

¹⁰³ Mpindyewu pàdi mwanèètù wa bakàji ùtùpèèsha cyonà bwà musambu ew apu. . . [Mwanèètù Branham ùdi wimbila mu matàma *Ndi MuMunangè*—Muf.] Twánjàayi ànu mu kalolo kàà bwobùmwe, patùdi basòmbe pàmwe mu myaba yà mu Dyulu mu Kilistò apa, mpindyewu pàtulàayi byònsò, bintu byònsò mu mwoyi wènù. Nènku vùlukàayi ne, Dìyi dyà Nzambi didi dyamba nànu. Mèmè ndi musadidi Wendè. S’ki Yèyè ewu. Dìbà adi tùlabulanganaàayikù ànu ku cianza ne muntu kampànda, twamba ne: “Nzambi àkubènèshè, mwanèètù.” Wèwè ne mwena lukunà, juukilà kuulu ùye kùdiye, nwamònu’s: “Nzambi àkubènèshè, mwanèètù,” patùdi twimba cipungulujidi eci kàbìdi ne tulabulangana ku cianza muntu ne mukwèndè. Kanwènaayikù mwà kucyènza mpindyewu anyì, ne kalolo kwònsò mu Nyumà.

Ndi muMunange, (Nzambi àkubènèshè,
Mwanèètù Roy). . . muMunange
Bwalu . . . wàkannanga kumpàla
Ne wàkampetela lupàndu


. . . ? . . . Ne byanza byètù byela muulu mpindyewu.

Ndi muMunange, ndi muMunange
Bwalu . . . (Vùlukàayi ne Yesù!)
Ne wàkampetela lupàndu
Ku mucì wà Kàlvariyo.

¹⁰⁴ Mpindyewu twìnyikàayi mitù yètù panshì ne tùwimbilaayi mu matàma. Kuvùluka Yesù!

. . . wàkannanga kumpàla.

[Mwanèètù Branham ùdi wimbila mu matàma.]

¹⁰⁵ Mpindyewu pàdi mwanèètù wa bakàji ùfila cyona, mu bupòle ne kalolo apa, nendombè mwanèètù mwímpè. . . Mwanèètù Neville, udi ne díyi dyúdi muswè kwamba, cintu kanà cyònsò anyi? Èyo. Ndi ndòmba Mwanèètù Collins udi paanyimà pàpa wàwa, mwanèètù mutekète, wa lulamatu udi mwab'ewu, umwe wa ku bakwàcishanganyi neetù, ní ùdikù mwà kutùtangalaja mu disambila. Patùdi twinyika mitù yètù apa, Mwanèètù Collins. 

62-1209 Kuvùluka Mukalenge
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org